

浦江縣志

卷五

兵防坊表

宅墓古蹟

直壘

浦江縣志卷五

志建置第二

兵防

營制 汛地 民壯 教場
險要 鋪遞 電線 兵事

易曰君子以除戎器戒不虞桑土綢繆之計講之宜
豫也浦僻處山陬背睦面括而肘腋乎杭越一旦有
事戎馬之足或濡浦陽之波濤兵可百年不用其可
一日不備歟今就舊志畧為增輯固疆圉防姦慝亦
安不忘危之道也志兵防

營制

府志唐置婺州鎮將浦陽鎮將蘭谿三河戍主領於浦

浦江縣志

卷之五

兵防

陽折衝都尉府駐劄越州西四十里為江南道府兵
二所之一

府志元各縣鎮守千戶所凡七一在浦江縣東南二十
步

國朝浙江通志分防浦江縣汛左營把總一員有馬戰兵

三名無馬戰兵二名守兵二十五名設防浦江湖公
廟汛左營馬戰百總一名守兵一十九名設防浦江
斤竹嶺汛右營步戰百總一名守兵一十八名

康熙初縣城建駐防衙署四閒營房六閒後房屋傾圮
駐防者多借寺觀居住乾隆三十六年把總王兆英



稟請上憲建造衙署縣令姚增倡捐勸助即於縣治東南按察分司遺址建堂三楹左右廂房六間互見公署門

康熙十四年二十九都胡公廟小汛分防外委一員建

造署房四間營房三間斤竹嶺小汛分防百總一員

建造營房四間後俱裁省乾隆二十八年復設胡公

汛協防外委一員今復裁省

按同治七年改立新章設千總一員由金華左營調駐浦江縣城減四存六設浦江縣汛步戰兵一名守

兵十三名

礮位 縣城安設劈山礮一位百子礮八位胡公汛安

浦江縣志

卷之五

兵防

二

設四號紅衣礮一位斤竹汛安設劈山礮二位

順治初年每鄉行團練法設鄉練以捍衛一鄉今鄉練

久草惟申嚴保甲以防察奸匪

汛地

浦江汛 金協調把總一員在城駐防存縣守兵三十

名

橫溪汛 在通化鄉六都乾隆八年建造營房三間煙

墩三座牌防一座望臺一座防汛兵丁五名

薛志按橫溪汛

與城寶山相近巖谷深邃道路四通當前代時山賊每據為巢穴一達兜率嶺與義烏縣交界一達太陽嶺與金華縣交界一達橫木嶺與蘭谿縣交界控馭之策正不可無兵以駐此

胡公汛 在興賢鄉二十九都金協調外委一員協防

舊有營房三間乾隆二十九年添造營房四間炮房

一閒煙墩三座牌坊一座防汛兵丁二十名

斤竹汛 在興賢鄉二十九都營房三間炮房一閒煙

墩三座牌坊一座防汛兵丁二十名薛志按胡公斤竹二汛與紫閣

山相近界連諸暨富陽蕭山等縣重巒峻嶺易為盜

藪昔時奸民嘗招集七命倚為窟穴四出抄掠興賢

一鄉最受荼毒今設胡公斤竹二汛使形勢聯絡擊

柝相聞防守者尚加之意哉以上俱本薛志按今

胡公汛外委一員久奉裁缺營房等均廢

橫溪斤竹二汛營房等亦廢惟基址尚存

民壯 弓兵附

〔舊志〕明英宗正統中設民壯二百名尋即停免武宗正

浦江縣志 卷之五 兵防 三

德十年照依丁糧增編民壯其六百名每二百名為

一班分作三班逐年輪班操演歲定工食銀每名七

兩貳錢世宗嘉靖四年省編民壯仍照丁糧減去四

百名止僉二百名每名歲定工食銀六兩知縣毛鳳

韶建言民壯輪班應役除上司按臨合力操演外餘

日盡放歸農至冬時就役工食止給一季神宗萬曆

二一年郡守黃焯議加八縣民壯共一千一百七十二

名并原存民壯二百八十八名共一千四百六十名

申詳院道請定各縣額數浦江縣額准一百三十名

每名歲給工食銀七兩二錢後因府城缺人防守又

於各縣民壯內量取三百八十名在府操守浦江縣額取三十名

附考舊志明太祖洪武時設立楊家埠巡檢司弓兵三十名後裁革

國朝實役民壯每縣五十名每年於實徵銀內支給工食銀二千三百八十兩一錢六分四釐康熙十五年奉裁康熙二十一年為欽奉

恩詔事案內奉文復留

現在民壯額設一十四名按年造冊報司

薛志按前明倭寇鳴張諸縣多被焚掠郡城震驚額兵不敷防守不得不增編民壯以充調撥

浦江縣志

卷之五

兵防

四

國朝自康熙甲寅三藩勦滅而後韜戈衅甲閭里太平民壯第充縣官差役之用徒耗廩食未免冗濫今裁存十四名亦因時立制也以上俱本薛志

教場

舊志宋設教場在縣東一里自元久廢莫詳其處明武

宗正德八年知縣鄒輓始置教場於東山龍塔之東

南地復侵於民世宗嘉靖二年知縣毛鳳韶復所侵

地周圍設土墩以界之東六十六步南四十九步西

五十九步北四十一步建亭三間名曰演武亭萬曆

四十四年知縣黎宏道重建演武廳

黎侯有記見壇壝門社稷壇下

按記畧云演武場距城東闔方一里舊未有廳邑君臨較觀兵僅棲遲於松杉蓬廠之下軍氣不張乃捐

俸造廳三間外築墻垣場前兀起轅門以通出入

國朝順治五年分防參將周一鳳重建講武堂并轅門圍

墻今皆廢薛志云浦江教場自明正德八年鄒侯

國朝雍正五年知縣秦文超奉文築先農壇始將講武堂

舊址建廟築壇每歲霜降日閱操官即於是處設座而舊制乃變按今壇址尚存廟已久圯

閱武 舊制霜降前三日巡捕等官率馬步快及民壯

弓兵演操至期印官率僚屬至教場祭旗蠶捕巡等

官督操如制行賞罰今雖巡檢裁缺不設弓兵民壯

減額其制仍舊薛志

險要

浦江縣志

卷之五

兵防

五

界牌 在縣東五十里二十一與諸暨連界明崇禎十

六年疊石置關於此險今廢按此通諸暨孔道並非

由諸暨宣和而進五指山可越嶺而過明初太祖遣

謝再興守諸暨以抗張士誠方國珍再興叛降士誠

李文忠在嚴州聞亂急遣將胡德濟進屯五指山下

李文忠議以諸暨浙東藩籬也諸暨不守則金衢處

皆不支矣親引兵馳至度地去諸暨城六十里並五

指山築城以守之名曰新城敵來攻不能下乃去既

而士誠復遣兵水陸並進踰浦江圍新城胡德濟求

援文忠遣陳愷為先鋒直抵浦境二十都之龍潭口

據險為營敵來攻李文忠遣朱亮祖陳愷等橫槊大

呼而入敵敗去於是新城之守固婺衢處皆無恙矣

步虛嶺 在縣東南三十里十三與義烏連界明崇禎

十一年知縣吳應台設望臺一座今廢按康熙十

變徐龔曹朱諸寇羣相騷擾據城為寨冬十二月十

八日邑令毛文埜請援兵勦撫賊遁入義烏追至戚

村橋步虛嶺
滅滅殆盡

太陽嶺 在縣南五十里九都地與金華連界向設石關

一座今廢咸同年閒賊來往金華悉由此嶺若作營防禦自可固守

橫木嶺 在縣西南五十里八都地與蘭谿連界明崇禎

十一年知縣吳應台設石壘一帶今廢按浦與蘭

山險要之區元季兵擾邑人蔣鏞築寨保聚境內皆

安又有盤山在金華北山之北亦險要可守 咸豐

十一年七月初四日粵匪入寇此嶺無兵

勇防禦遂由蘭越嶺直趨五路嶺入浦

井坑嶺 在縣西四十里三都地與建德連界明崇禎十

浦江縣志 卷之五

一年知縣吳應台設望臺一座今廢按此嶺為通

九月二十四日賊自嚴州小里埠過此嶺入浦同治

元年閏八月初三日踞城賊與花旗賊由此嶺竄嚴

截柘嶺 在縣西北四十里二都地與建德連界按此

西北咽喉咸豐十一年九月賊由此嶺往破嚴州府

同治元年閏八月花旗賊與踞城賊悉由此嶺而去

又有夷嶺亦閒道險要也

馬嶺 在縣西北五十里二都地與建德連界直源至

桐廬鷓鴣埠按此嶺為通桐建要道咸豐十一年八

門出經此嶺回省九月二十三日守城軍因糧盡援絕由西

此嶺來浦同治元年八月朱宅團勇于馬嶺寺下登

陽塘關 在縣東北九十里二都地與諸暨西鄉連界

有賊數千札營時來攻打馬嶺溪與梓州局勇日

夜防守九月初十日會同大小姑及

嵩溪團勇由此嶺往衝鷓鴣賊卡

唐宋置關於此今廢咸豐十一年諸生戴熙堂辦

團防守此關諸暨令許瑤光給火藥

鉛彈以資堵禦九月二十六日賊由開道入關破與子與灌死之

金沙嶺 在縣北九十里

三十都地

與富陽連界明崇禎十

一年知縣吳應台設石關一座

今廢 咸豐十一年九月二十六日賊至

馬劍等處義勇奮禦之殺賊數名賊即由此嶺竄入富陽

蕩江嶺 在縣北七十里

二十七都地

嶺上有寺與桐廬四

管杏坑連界

按此嶺低小無險可守如桐邑柴埠有警宜守裡松山楊家嶺其嶺高峻路亦

崎嶇疊石為營自可固守同治元年八月廿七都周志悅等集團設局於蕩江嶺上時桐邑裡松山有賊卡離局五里許志悅會杏坑局勇衝卡殺賊數十名奪馬二匹至九月二十四日踞桐賊賴剝皮由柴埠進兵希圖報復杏坑與志悅局勇禦楊家嶺賊受創而退翼日早晨賊攻益急義勇槍石俱下賊乃各持稻草一束分三路而上時勇未齊集勢遂不支潘懷德陣亡然亦不先疊石為營故也

浦江縣志

卷之五

兵防

七

舖遞

浦陽驛

浙江通志

在縣東北二十步宋紹定二年知

縣李知退建舊稅課局即其址也

今裁

縣前舖

舊在縣前西偏

舖司一名舖兵二名遞五路嶺舖計程

十里

久裁

五路嶺舖

原有郵亭久裁

舖司一名舖兵二名遞洪溪舖計程

十里

久裁

洪溪舖

有郵亭

舖司一名舖兵二名遞白棗舖計程十里

久裁

白棗舖

有郵亭

舖司一名舖兵二名遞沙溪舖計程十里

久裁

沙溪舖原有郵亭久廢舖司一名舖兵二名遞太陽嶺舖計程

十里久裁

太陽嶺舖原有郵亭久廢舖司一名舖兵二名遞金華縣抱溪

舖計程十里久裁

電綫

光緒六年通商大臣李鴻章奏行陸綫電報南北中外

消息頃刻可通縣於九年設立每地隔數十丈植杉

木一株梢懸磁瓶紫引鐵線二條自諸暨入縣境界

牌宣經白馬橋鄭義門王公橋七里亭城南沿江過

浦江縣志

卷之五

兵防

八

前吳界牌源通化橫溪石埠頭等處遞入蘭谿有電報局

復經衢州達福建諸省相引不絕以速音報亦從來

所未有也

兵事

宋書褚叔度傳宋少帝景平二年褚淡之為會稽太守

富陽縣孫氏聚合門宗謀為逆亂淡之遣隊主陳願

郡議曹椽虞道納二軍過浦陽江願等戰賊遂摧鋒

而前

鄭剛中北山集送浦江石尉序宣和二年初春妖賊犯

浦公未去十里而邑已為灰三年秋賊氛廓清羣醜

殄滅

宋濂人物誌黃仁環傳宋高宗建炎元年山賊何三五作亂仁環與唐子容謀偽與賊合留其主首引眾鼓而東行十餘里至朱邨分路口轉陣殺賊子容奮兵擊賊千餘人得脫者無數輩諸酋留者仁環令諸子享於家酒酣用斧自後斫殺之

舊志宋高宗紹興中值睦寇亂邑侯黃汝楫出己資輸賊乃不犯界四境晏然

宋濂集戴理墓誌銘宋恭宗德祐丙子之變惡少年相挺而起執白梃暮夜擊傷民咸不能自保戴理用計

浦江縣志

卷之五

兵防

九

安之

宋濂集曾侯嘉政記元順帝至正十八年春三月西睦州陷夏四月壬午江浙行中書左丞楊公以浦陽隣睦命宣慰曾侯率杭師來鎮其地

曾侯名華武岡人

宋濂集諸子辨記元順帝至正戊戌春三月西師下睦州浦陽壤地與睦境接居民震驚多扶挈耄倪走旁縣

府志明兵取婺州胡大海先下蘭谿遂入浦陽義烏取道至郡城

舊志明太祖取金華李文忠下浦江與諸暨張士誠相

拒豎旗設烽燧於石臺盤山

在縣南二里

舊志明世宗嘉靖三十六年倭夷犯境

明史陳子龍傳東陽諸生許都者副使達道孫也家富任俠好施陰以兵法部勒賓客子弟思得一當子龍嘗薦諸上官不用東陽令以私憾之適義烏奸人假中貴名招兵事發都葬母山中會者萬人或告監司王雄曰都反矣雄遽遣使收捕都遂反旬日間聚眾數萬連陷東陽義烏浦江遂逼郡城既而引去巡撫董象恆坐事被逮代者未至巡按御史左光先以撫標兵命子龍爲監軍討之稍有俘獲而游擊蔣若來

破其犯郡之兵都乃率餘賊三千保南砦雄欲撫賊語子龍曰賊聚糧據險官軍不能仰攻非曠日不克我兵萬人止五日糧奈何子龍曰都舊識也請往察之乃單騎入營責數其罪諭令歸降待以不死遂挾都見雄復挾都走山中散遣其眾而以二百人降

舊志明崇禎十六年東陽許都聚眾倡亂人民逃竄賊黨義烏吳奎於十二月十三日破城坐縣十八日杭營游擊蔣若來討平之斬賊五百餘級

國朝康熙十三年甲寅因逆藩耿精忠叛東義永浦四縣城破九月閩寇徐尙朝札營積道山郡城危甚十二

月 康親王統率大兵駐婺州相機勦撫尙朝敗走
遂復東義等四縣

按張一煒暢吟稿載康熙甲寅孟秋朔永康徐寇入城是夜捨而殺之毛邑尊叙功奏捷初九日龔寇突來十一夜潛遁九月重九龔寇復至此三破城也皆不搶掠三日而去二十五日聯絡社兵往通化破曹寇敗回二十七日大夥入城搶掠十月朔各鄉社兵泊城殺賊不勝愈肆焚掠初四日官兵至遂奔義烏二十九日朱賊由紫閬寇二十五都仲冬二日賊破二十四都焚掠異常初四賊自二十四都進城劫掠屋無完壁十八日毛邑尊請援兵至勦撫蕩平

府志康熙十三年閩寇猖獗浦邑人吳尙鉉率先捍禦與賊戰於松村死之

薛志按逆藩耿精忠於康熙十三年三月二十四日兵度仙霞嶺直犯浙東伏莽探丸輩各授以劄偽都

浦江縣志

卷之五

兵防

十一

督朱德甫率賊焚掠縣境邑人吳尙鉉團集里中健兒於九月二十五日與賊戰於松村爲賊所害知縣毛文埜赴省乞師賊覘知無備擁眾入城四鄉羣不逞之徒多附之各建旗號肆行劫掠十二月和碩康親王統兵遣將勦捕賊聞之遁入義烏官兵追至戚村橋步虛嶺盡殲滅之

咸豐十一年秋粵賊犯境城陷踞之

按是年四月十九日賊渠偽侍李世賢陷郡城抵七月初四日犯浦八月二十三日城陷偽侍令賊黨殷天義徐朗踞之

同治二年正月十六日克復縣城

時巡撫左宗棠督師克復龍游蘭谿湯溪金華諸縣郡賊皆竄人諸暨義團隨官軍復縣城副中營劉璈臬司劉典先後至浦凡從賊匪徒咸爲正法地方肅靜復立善後局并設粥廠以活饑民

坊表

觀於坊表而知

朝廷激勸之意至渥也士崛起巖穴致身通顯即得勒名
貞石表著都邑間其他閭里婦子節行茂著亦得蒙
顯旌垂不朽士習民風能不爭自奮乎邑坊表雖多
頽圯而舊乘可稽國瞻喬木家續箕裘是所望於後
人云志坊表薛志

前朝

五鳳齊飛入翰林坊 為學士宋濂尚書鄭沂左庶子

鄭濟右庶子王勳一作王勳侍書宋懌立舊在文明門內今廢

浦江縣志 卷之五

進士坊 為雲南參政沈文立在水埂巷口咸豐辛酉兵燹後柱石無存坊基

被佔同治五年控追邑令李斷令改建木坊

忠清良翰坊 為雲南按察副使張元諭立在縣治前

進士坊 為廣東按察使司張應槐立在學前

進士坊 為吉安府同知倪尙忠立在龍池倪氏側

進賢坊 為舉人嚴怡立見府志今廢

登雲坊 為舉人王灝立見府志今廢

高桂坊 為舉人方彰立見府志今廢

登賢坊 為舉人趙貞立見府志在二都今廢

賓興坊 為舉人嚴文啓立見府志今廢

昭文坊 爲舉人張協立 見府志

世科坊 爲舉人黃煜立 見府志

別駕坊 爲通判陳玉立 在南門

助義坊 爲張子鴻張子治張子淳立 久廢無考

義門坊 在感德鄉 爲鄭氏立 歷宋元明扁其門曰旌表孝義

鄭氏之門 元余闕題贈東柳貫有記 記云治古之時

則有法若制爲冠昏喪祭之儀與施之親疏隆殺之

等凡因人情立人義而繫乎一家之政令者皆是也

然宗雖叙於一家而法實周於天下間與黨率胥成

孝敬之風化洽教孚壹是仁讓之俗於斯時也義且

泯於無形而名烏乎生蓋至於道隱民散代表衰禮晉

而宗統服紀邈焉無屬借鋤取帚勃篲闕牆或不待

閱世而繼見之矣則夫操長民之柄者將以致其潛

轉密移之功亦安得不爲之率德厲行使之知所勸

浦江縣志 卷之五 坊表 二

而強於爲善善者既彰惡者斯瘳於是又取其出於
天性而和諸物則人人可制而行之者命之曰義字
其民曰義民表其門曰義門扶衰救敝名存與存君
子蓋有所甚不得已也記曰大道之行與三代之英
某未之逮也而有志焉大同之世吾不得而見之得
見小康者斯可矣然則舉斯世之大而義之聞見者僅
僅若是是是可嘉也亦重可嘆也吾里鄭氏之以義門
被旌表且三十年於茲視其家庭而其悖源遠矣蓋自其
日滋講信修睦之日謹植本固而浚源遠矣蓋自其
遠祖淮始與其二兄卜吾縣之承恩里居焉其後三
家浸盛名其地三鄭示有先也沿淮而下五世曰德
池德珪德璋率之勤儉以啟大其基六世曰文嗣大
和文泰文厚文轟重之積善以恢宏厥緒併其翼子
貽孫閒及八世不裂籍以爲異不殖己以自私尊尊
而親親老老而幼幼凡聚廬以處同釜甑以食者支
屬口餘百僅手指千薰然義風不戒而趨爲之冠昏
以重其始爲之喪祭以厚其終月薦以著存時饗以
尊者男事詩書女事蠶績昭穆有序貴賤有差出相
助也入相保也服勞於作息之間繫維於禮法之內
雖等之十世以至於百世可也初里者列其事於縣

縣令長上之大府具移廉訪使者覆按如章以次達於中書下之儀曹請用故事賜旌表亦既報下大書其門曰旌表孝義鄭氏之門矣今文嗣文泰文厚文轟皆不克壽而大和方以踰七望八之年益經紀其家事潤飾其門戶凡欲納之於禮範之於義而後已會朝廷方修通制頒行郡國若曰諸以孝義旌門者與免雜役縣復準令有請及轉而上聞由部而省咸謂宜如制令即賜蠲復命既下大和感激思奮拜手稽首言曰熙朝之所以惠綏於我屢里之細吐者可謂至矣吾高曾祖考之所以啟佑於我不令之子孫者亦可謂厚矣大和耄且及之誓殫餘晷課諸子姪力耕以奉公上而暇則詠歌帝力終為盛世之幸民而已顧惟伯父當干戈俶擾之際早捐館舍吾先人抗身艱阨上奉尊老下慈孤幼敷菑樸斲以紹開先業至於吾世而吾兄文嗣吾弟文泰益劬劬盡瘁纍銖積寸修其疆畝以畢茲塗矍惻燎再世豈易然哉今進承旌復之恩拔諸什伍之籍譬之塗芻行輩得免牛羊踐履甚幸甚休使不謀文顯刻金石則何以迓續芳猷傳之來裔乃以其文屬貫貫復之曰義出乎人心而還以制乎人心者也自其動於所感或不

浦江縣志

卷之五

坊表

三

能無欲而世遂以為欲勝則害義義立則利無以存彼蓋知夫孟氏義利之反矣而不知記禮者之言固嘗深致意於人情義人利人患之辨而又必曰舍禮何以治之惟其本義以制情是以因義以成利以利為利者末也而以義為利知其本者也然則治之以禮其諸總攝人心攜持世故之微權也歟君子蓋有所甚不得已焉而非其盛之謂也旌門復役國之令典而顧以畀諸一介草莽之臣其鼓舞興起之意夫豈私一鄭氏哉機動籟鳴必有得於言意之表者而貫何足以知之貫里人也請以是刻之庭曲之碑以侈茲幸遇而且以貽諸後人云宋方鳳題鄭氏義門詩人愛渭水清畢竟河流渾不知唐虞世何處覓旌門旌門縱百世豈能外彛倫只因風氣薄遂表為義民麟溪有寒泉西流類拖紳泉聲偏塞耳亂却牝雞晨夜帳潑烟黑秋缸吐火紅六世孝友家元屬書聲中爛銀鋪作榜綽褱何崔崔戶神似相語莫遺阿奴來人心一遭蠱五官皆作魔不賡斯干詩却聽燃其歌兄弟本一氣為利分爾汝借問嗜利人千載得不得死鴟鴞巢滿林何地不感惻若非慈烏啼血淚收不得我身乃親有况此身外物世人果何思肝膽

每相賊當年朱兩旛回首血在頤爭如義門鬼千載
不餒而何人非楊椿如椿能幾人只緣本心死所以
有溜磷大樹大十圍枝葉日敷蕃願培百尺士庇此
千歲根元余闕美義門詩省風浦江澣憑軾歷高
門借問居幾何九世今不分解驂青松林愛此季與
昆檢身事先訓禮度尤恭温生祥亦何用有後天所
敦常棣閔叔成厲階悲婦言一朝或罔念喪敗甯具
論清源無濁流芳蘭有競芬擗毫誦勿替勉哉賢子
孫元陳樵詩二老連枝樹諸郎百子蓮同心無爾
汝合族到曾元化治文明日涓還太古年名門人共
羨家範世應傳元汪文璟詩高門崇重十行書古
屋周遭百忍圖九世一家真罕有五公七相定何如
教行官署嚴無異食散僧房靜不殊
更喜芊綿書帶草故家通德慶方餘

純孝坊 為孝子石東華立在政內鄉

百歲坊 施孟鎬為其父百歲翁仕玳立在通化鄉薛志作為

施朝棟立
今改正

浦江縣志 卷之五 坊表 四

節孝坊 為張應華薛志作妻鄭氏立在張祠前

節孝坊 為妻樓氏立在縣東北今廢

貞孝坊 為周思諒妻吳氏立在縣治西街

國朝

父子同登澤流益雍坊 為舉人朱鶴鳴進士隴州知

州朱興燕立在縣治前大街

孝子坊 為孝子方應秩立在通化鄉今廢

旌孝坊 為孝子吳守攜立

旌孝坊 為孝子陳之璉立

旌孝坊 為孝子石文楫立以上在政內鄉

旌孝坊 爲孝子張啓旭立

純孝坊 爲孝子黃應律立

孝子坊 爲孝子黃昌期立 以上在靈泉鄉

純孝坊 爲孝子鄭爾壽立 在感德鄉

孝節聯芳坊 爲孝子張德冠節婦鄭氏立 在小東門

旌節坊 爲周能約妻王氏立 在縣治西

旌節坊 爲張咸濟妻黃氏立 在大北門

旌節坊 爲吳一貢妻金氏立

旌節坊 爲金國璉妻樓氏立

旌節坊 爲盛尙稠妻張氏立

浦江縣志 卷之五 坊表 五

節婦坊 爲盛尙涓妻張氏立 以上在德政鄉

雙節坊 爲潘志珙妻張氏立 在嘉興鄉

旌節坊 爲黃應上妻傅氏立 在靈泉鄉

旌節坊 爲吳明燧妻陳氏立

旌節坊 爲鄭爾銘妻倪氏立 以上在感德鄉

旌節坊 爲方清泰妻金氏立

旌節坊 爲倪尹徵妻陶氏立 以上在通化鄉

旌節坊 爲朱之煜妻張氏立

旌節坊 爲虞啓謨妻張氏立

旌節坊 爲毛可瓊妻樓氏立

旌節坊 爲石邦甯妻虞氏立

節孝坊 爲石興星妻潘氏立 以上在政內鄉

旌節坊 爲張以忠妻陳氏立 在興賢鄉

以上本前志下係新采

進士監察御史坊 爲江南道監察御史朱能作立 在縣

治前大街

進士坊 爲武進士吳大榮立 在二都前吳

樂善好施坊 爲柳益謙妻張氏立 在七都橫溪

節孝坊 爲樓紹陞妻傅氏立

節孝坊 爲樓紹隨妻陳氏立 以上在六溪樓

浦江縣志

卷之五

坊表

六

旌節坊 爲戴聖欽妻張氏立

旌節坊 爲戴變元妻馬氏立 以上在北鄉馬劍

旌節坊 爲陳光照妻張氏立 在城

節孝坊 爲朱宗儒妻周氏立 在城

節孝坊 爲張德蔡妻傅氏立

旌節坊 爲張可沛妻黃氏立 在張在裡

三節坊 爲張可勳妻戴氏可羔妻芮氏可杰妻鄭氏

同立

旌節坊 爲張可能妻陳氏立 在十都馬墅

旌節坊 爲周元昂妻鍾氏立

節孝坊

為黃幾挺妻朱氏立

在十八都芳地

旌節坊

為樓廣德妻陳氏立

在城東街

旌節坊

為張子瀟妻樓氏立

雙節坊

為樓永信妻

費氏立 在城東街

旌節坊

為陳鈞妻盛氏立

在城後街

旌節坊

為施惠愛妻祝氏立

在通化鄉六都

旌節坊

為施亦旺妻陳氏立

同前

節孝坊

為貢生吳嘉禾妻全氏立

節孝坊

為王志棣妻黃氏立

在十九都前店

節孝坊

為庠生王舟妻張氏立

同前

浦江縣志

卷之五

坊表

節孝坊

為鄭廷憲妻黃氏立

節孝坊

為潘善足妻陳氏立

節孝坊

為陳學聚妻鍾氏立

節孝坊

為鄭思壘妻張氏立

節孝坊

為張邦縻妻陳氏立

在一都天仙塘

節孝坊

為鄭遵堅妻吳氏立

雙節坊

為石延暉妻張氏媳陳氏立

在城西街

太平坊

為沈科八立

在興賢鄉

學宮坊附

騰蛟坊在學宮左

起鳳坊在學宮右

薛志云按舊志明世宗嘉靖三十年知縣韓叔陽始建騰蛟起鳳二坊於學宮前之東西神宗萬曆十四年知

縣張而烟重修

國朝乾隆十九年知縣王果移建櫺星門并騰蛟起鳳二坊同治初重修光緒十八年起鳳坊被風吹圯重建

街市坊附

陽澤坊在縣治左

香巖坊在縣治左

月泉坊在縣治右

惠政坊在縣治右

賓德坊在縣東後街舊志訛作賓往

升俊坊在縣治東橋西

朝京坊在東橋西府志舊名德政

崇儒坊在縣治南府志舊名儒行

浦江縣志 卷之五

坊表

八

熙和坊在縣治南

臨浦坊在縣治西

孝睦坊在縣治北

和豐坊在石橋頭右以

四牌坊在縣治南大街府志明孝宗宏治十三年知縣

忠文南曰登雲西曰孝義北曰遺愛今廢

宅墓

古人不可作矣而於其生居卒葬之地每使人低徊不能去是故書曰表厥宅里又曰封比干墓聖帝明王所以彰善闡幽者典至渥也矧在桑梓之邦時世雖殊山川如故而忍令其湮沒也耶志宅墓

隋黃將軍苾宅

在縣治內按康熙縣志云浦陽自唐天

寶十三年陞鎮為縣苾之裔孫縈捨故址於官今縣

治是也

按黃縈生於唐大中三年己巳去天寶年間遠甚所云捨宅基為縣治者乃苾八世孫汝

智也舊志有誤

宋鍾孝子宅故宅

在興賢鄉二十八都東山下

俗名東司下

浦江縣志

卷之五

宅墓

于員外郎房宅

在靈泉鄉左溪山下

梅節愍故宅

在縣南三十里舊志梅溪源出黃茅山

經梅執禮尚書宅前西流入蘭谿是溪以姓得名也

今溪口小橋側有上馬亭相傳為梅公上馬處

明邑人張

孟兼過梅節愍故宅詩梅溪倘可作吾此溯微湍力罷千金括謀迴萬勝鑿孤忠殉社稷亂石葬衣冠依

約會棲處楓邱血尚丹

倪處士朴宅

在縣西五里保安山下石陵畝

鄭孝子綺宅

在感德鄉白麟溪

方文學鳳宅

在德政鄉浙江通志謝翽遊仙華巖麓

記云巖之麓曰鄭村友人方君韶卿廬焉金華文畧

浦江仙華山殊為秀絕方鳳詩云仙華矗萬仞我乃

廬其東國朝金華曹開泰過方韶卿先生故里詩

黍離麥秀悲歌客剩水殘山孑立身孤竹由來商義士柴桑不愧晉遺民風騷沿派今誰主生死窮交憶此人故里蕭蕭容躑躅仙華山下踏香塵

黃處士景昌宅 在靈泉鄉古城寺東後宅

元柳待制貫宅 在通化鄉烏蜀山下

吳淵穎萊宅 在德政鄉吳溪浙江通志吳溪去縣西

十里吳萊之居在焉

戴提舉良宅 在興賢鄉九靈山下浙江通志浦江縣

北九靈山戴良居此故號九靈山人

明宋太史濂宅 在感德鄉青蘿山下太史有青蘿山遷居志互見古蹟門

浦江縣志 卷之五 宅墓 二

張太常孟兼宅 在縣南十里宋溪平安張

張副使元諭宅 在城北隅槐花樹裏

漢交州刺史楊扶墓 在縣西北二十五里

撫州刺史蔣邵墓 在縣西四十里朱村蔣家頂

鄂州刺史傅柔墓 在縣東二十五里鶴塘之西

國朝邑人陳果訪傅刺史墓詩滿地土花碧殘碑臥夕陽幾聲秋雁語霜影落寒塘

車騎大將軍張敦墓 在縣東四十里今失其處舊志作諸暨令

隋金陵黃將軍苾墓 在縣後小北門裏西首

唐孝子陳太竭及父武鼎墓 在通化鄉松柏橋縣南二

十五里

黃某墓 唐十道圖縣有此墓 莫詳其處亦遺其名

處士何千齡墓 在縣東三十里

朱宗室趙不玷墓 在縣東五里土名羅帶 周至元儼之曾孫從高宗

南渡初居睦州後遷於浦

屯田員外郎于房墓 在縣東二十五里左溪山側

工部尚書錢適墓 在縣南五十里通化鄉鳳凰源

戶部尚書梅執禮墓 在縣南三十里通化鄉土名金

剛肚 或云骸骨不歸 只葬衣冠之所

贈光祿大夫方逢原及子大中大夫揚遠墓 在縣北

八里仙華山下

浦江縣志 卷之五 宅墓 三

布衣倪朴墓 在縣西五里石陵村東 ○國朝邑人朱興悌謁倪文卿

先生墓詩草莽書生依朱土北望中原思藝祖宮車 淚灑牟駝崗雪恥不忘縛金虜袖中擬上中興書滿 壁張圖森部伍布衣老不掛朝纓慷慨大聲咤廣武 天涯淪落莽蕭蕭誰其知者陳同甫石陵原上高士 墳仵立蒼茫為懷古風流消歇七百年萬樹秋聲啼 杜宇○邑人朱寓過倪石陵墓詩奇謀不用竟長眠 俠骨深深闕九泉肉食君臣甘割地布衣男子枉呼 天圖經四壁埋荒草麥飯千秋享野田莫憾平生知 己少龍門前 有一龍川

殿前捲簾使黃景珪墓 在縣北四里 其父昉自江西 遷葬縣西十五

里上洛元學士 潛其九世孫也

工部侍郎傅雱墓 在諸暨縣錢塘北山之原地名滴

水坑 舊志載與弟光合 厝縣東胡坂誤

冲素處士鄭綺墓

在縣東二十五里懸柏原

龍游丞鄭德珪

墓在縣東二十五里裏朱塢揚田青田縣尉鄭德璋墓在縣東二十五里東明山鄭文融墓在德珪墓側

○邑人王可儀懸柏原詩晨霞濕幽蘚淚痕如未乾斯人不可作墓木猶丸丸歛衿拜棘門慄然肅觀瞻

青松淒以勁西風掃空壇慈幃在咫尺撫墳空嗟嘆黃泉千載下晨昏問暄寒○陳郁詩拜墓今仁里旌

閭昔義門孝能菽水盡道可布衣尊壠樹經時代筐蘋閱子孫殘碑猶好讀落日掃苔痕

尚書右丞毛洪墓

在縣北三里茅菴塘左

浦陽提鎮張祚墓

因官徙浦葬縣東五里李家山其子森孫恕厚坦俱葬五里原

說書樓斌墓

在縣南五里聖昌寺側

右司朱原龍墓

在縣東二十五里普安院側

文學方鳳墓

在縣北八里化城院側

元邑人柳貫十一月十六日

浦江縣志

卷之五

宅墓

四

為仙華先生寓祠植碣於其墓北化城僧舍里之交友咸來會祭歸而成詩用識斯事先生隱仙華卒葬仙華麓淒其十霜露墓草今幾宿承為不朽事誅行當有屬業鉅自宜久才微豈堪服重予師友義屢勉承記錄鋪菜雖勿工序述皆可覆平生有道碑此筆知不辱但嗟無繚藉吉荐忝嘉玉成碑懸窆後合置庭之曲奈何荒阡中風日所飄暴乍可牛厲角敲火防童牧十夫昇致之寄幕託僧屋并為近墓祠對泉荐秋菊交朋響然臻杖屨或不速意氣有歆動夫豈為肴菽茲山望其廬數里入陰谷離離紫翠間歷歷盤游躅定應挾飛仙時來蔭雲木微吟應吹鶴高舉還騎鵠誰家松柏墳行鹿不敢觸運往無須火夷毀己為陸春花照黃壚有酒無茅昔先生死布衣桐棺僅能束葆茲泉阿藏免彼塗芻蹴斯文在天地千載如轉燭顧其不亡者往過來已續雖微豕瘞文尙有藁充篋清詩數千篇一一汰魚目簡蒐付方來後死慚不穀藏之於名山斯言可予復○國朝邑人張燧謁方韶卿先生墓詩化城尙誌宋遺民剩水殘山寄此身海外乞師空畫策舟中立國竟沉淪家仍漢臘滄桑改劍許嚴臺意氣新愁對西風碑碣盡寒烟處

處雜
荆榛

田居子黃景昌墓

在縣東南三十里華塘山原

邑人元

吳萊溪行望黃明遠華塘新墓詩往代衣冠日已賒故山棺槨此為家經筵義關中州魯樂調辭譏下里巴涕淚無從餘宿草文章可惜等風花嗟茲便欲酌雞黍日駐前溪有落霞

元待制柳貫墓

在縣南三十里通化鄉荆山

內翰陳公舉墓

在縣西八里磊石之原

永新州知州趙大訥墓

周恭肅王元儼十世孫墓在縣東五里之龜山○邑人戴良謁

趙朝列墓詩含辛度連岡掩泣赴孤阡而我為誰悲懷人在九泉西北兵旣動東南旋遘患一朝烈燄起鄰壤頓燒燔長風當夏急亦知將燎原不謂事之及乃在奄忽閒天道幽且遠禍福茫昧然方晨家盡燬夕暮身復捐平生飲若人銳氣蓋當年鋤頑務刑肅決壅思化宣矧茲大節在可使非義干日月易為久

浦江縣志

卷之五

宅墓

五

墓草已芊芊園林滅游跡祠宇有餘閒既乘往化盡何用空名傳

大學士吳直方墓

在縣西十里吳山徐塢

處士吳萊墓

在縣西十里盍塢

○邑人張德慶過吳淵穎先生墓詩落日

淒其斷水痕徒將孤憤破黃昏悲風獨下羊曇淚衰草空迷望帝魂天上已知容處士人間誰復問王孫石碑古篆看明滅悵望遺文酒一尊

處士王澄墓

在縣東二十五里大樣原

為深溪王氏同居祖宋太

史有墓誌銘

提舉戴良墓

在縣南十里嘉興鄉西山

明浦江翼右副元帥蔣鏞墓

在縣西四十里長富源石

洩

千戶侯陳愷墓 在縣東十五里上山頭

浦江翼左元帥吳志德墓 在縣西十五里東塘珠山

禮部尚書鄭沂墓 在縣東三十里松溪山

左庶子鄭濟墓 在縣南三十里馬塘塢

右庶子王勲墓 在縣東廿八里茅草山下

太醫院使戴思恭墓 在縣北八十五里興賢鄉獨秀

山

孝義張永遷及孫鄉賢孟暄墓 遷墓在縣北五里黃

鄒山 暄墓在縣東四十里黃墅山

忠義永福縣令周煥墓 在縣西五里下黃

浦江縣志 卷之五

宅墓

六

雲南副使張元諭墓 在縣南十里五路嶺伏虎殿前

瀋府教授蔣大祿墓 在縣北四都西庵上天生頂

處士張元珂同父孟鶚墓 在縣西北十五里茅蘆山

下益大塢

義士朱君正墓 在縣北二十里二十五都大徐畝

國朝上書房翰林戴殿泗墓 在縣北二十九都石門天

師堂屋後山

山西按察使戴聰墓 在諸暨二都萬家塢墩子山

附

明宋學士夫人賈氏墓

學士濂徙蜀葬夔府西蓮華峯下夫人早卒阡縣東三十里青蘿山下

下按康熙志云近旁有田相傳為宋公次子璵藏地

署縣熊人霖捐俸贖歸封土立碑○國朝邑人朱興

佛遊青蘿山訪宋仲珩先生墓詩潛溪碑版仲珩筆

是父是子稱雙絕李斯篆刻北海書磁石引針真入

室墨妙流傳玉兔泉蠅頭細字蟠桃核明初鼎力有

三雄克也廣也共超拔詩歌况復掣長鯨硬語盤空

如屈鐵坡老後人小斜川歐公嗣子張蔡匹潛溪著

述婉歐蘇仲珩繼之飛健鷗翩翩才藻中書君鴛序

追陪朝天闕朔風悲號黑浪翻捕黨紛紛濺碧血三

十餘齡命須與青蘿山下埋英骨我讀哀辭希直銘

我誄蘿山訪幽穴不見荒原曩屬碑秋草轉蓬風瑟

瑟嗚呼仲珩人中英天付以才命何關長與潛溪照

古今歷劫飛灰名不沒

後梁錢魏王墓

在縣西十五里

按舊志云王乃武肅王諸親不知何名

浦江縣志

卷之五

宅墓

七

元達魯花赤廉侯阿年八哈墓

北庭人卒於官葬在縣之東南十五里白石源右關

山按戴良甘棠集序三年政成將歸遮留者競作

詩歌詠之則卒葬不在浦邑矣今姑仍舊志存之

邑侯謝泚墓

永樂七年知縣建甯人卒於官葬縣東南十五里花山

古蹟

城高鐵甕地雄廣武劔閣之銘尙在銅鞮之水依然
此懷古者所爲百感遙集也然而入尙書之塢慕其
清高過安樂之窩想其自得援古蹟以厲今人則已
有聞風而起者何必虛稱遼闊哉志古蹟薛志
豐安廢縣方輿紀要浦江縣西南有豐安廢縣沈約宋書
所載是也考宋書豐安自孫氏始立屬東陽郡第七縣
隋平陳始廢是唐未置浦陽以前爲豐安縣縣立凡三
百九十四年今基址無考當在縣之西南鄉浙江通志
以其縣與廢入浦江建置中

浦江縣志

卷之五

古蹟

一

一境森羅亭在縣北二十五里惠香教寺之北山徑紆迴
林木葱鬱折而東曰分月亭亭在兩池間故名又折而
西曰狎鷗亭亭高而聳下臨方池爽氣浮動亦勝境也
廢今

洗鉢池在縣東二十五里雙溪院西南隅唐時元朗大師

建庵於此

宋邑人于髡洗鉢池記神迹伽藍山水佳勝

洗鉢唐天寶十二載因大士元朗者庵於山修心得旨
攝伏鳥獸使無畏懼每飯已則猿來捧鉢盥于其中今
可驗者李公華之碑嘗言之矣及予營構是院所謂池
者湮塞已久顧語其眾曰前人之跡不可廢也乃令斬
茅茨出泥滓疏鑿舊基導引澄流廣不盈丈深不盈尺
夏之日吾愛其清冷若白石若輕冰飲之使人凜如也
冬之日吾愛其潔澈若醴泉若温井飲之使人煥如也
時潦無滿時涸無竭浮雲晝覆疑屏蔽之狀皎月夕照

混澄明之光矧夫毳侶論心逸人訪道狎玩者可以滋其神智鑑矚者可以滌其根塵陰爲利益又難盡紀所謂水之勝者也功訖盍書之乎乃記於石消化元年十一月十一日

齊雲閣在雙溪院中俯瞰四山極其幽曠宋邑人于房詩

閣倚天外山川混一色雲霞忽萬態啼鳥聲交呼牧豎歌相對憑闌增氣味披襟絕埃壘飛泉出陰窅清氣來向背文酒歡賓朋樂哉時褫帶宋關詠詩白雲來軒戶清風生澗壑山僧不管春巖花自開落明會稽楊瑾詩我亦似孤雲更坐齊雲閣出處本無心同在天一角國朝邑人陳毓秀訪齊雲閣遺址度雲掌巖而歸詩齊雲閣昔凌雲出頽垣無復題雲跡白雲悠悠常在山無心又遇尋雲客趨林鳥影度斜暉蒼然暮色生巖扉樵夫荷擔穿雲出今廢余亦扶雲踏月歸

龍峯塔在縣東門外里許宋仁宗天聖三年僧咸若募兵

部侍郎胡則捐錢百萬建元釋自閒修塔記浦陽邑東南一里有吳赤烏中龍德寺

浦江縣志 卷之五 古蹟 二

是爲觀音僧伽二大士靈感道場宋天聖乙丑永康胡則捐錢百萬陳公養施輒千竈建塔山巔七層六面周遭欄楯金碧丹堊類眾寶合成鐵鳳風翔金鼇山負龕燈光彩參錯星宿天風時至簷鐸之聲聞於數里春暄秋霽遠近士庶登覽無虛日空霏撲面露氣逼人左右顧盼嚴越山川雲氣遙接仙華巖與雷公山相爲主賓花封蠟埴數千百家出入浮屠影中誠此邑之壯觀也宣和歲辛丑鄰寇煽殃屹立烈焰中不壞信士朱寵等修之寶祐甲寅寺僧子豪重修垂四十載大朝至元壬辰忽一夕大雨震電及霽勢若微側豈天龍以舊觀未還有所警而然耶住持文啟歎曰三災已定四相靡常我輩豈容少懈與其徒妙思妙靜傾衣祴募檀信竭乃心力固本而正其末張忠厚等施白金飾輪之表至於大雄紺殿圓通寶閣堂室門廡甍階石道粲然一新岳陽教授陳公舉書榜邑寓凌蘭吳幼敏樓榮孫與七鄉善士捐貲交助越六載乃成眾皆歡喜讚歎謂前莫及昔越州龍興沙門曇彥與許詢元度同造二大塔彥有神異天降相輪能駐日信工塔未就詢亡彥年百二十餘猶待得詢後身爲岳陽王承誌公密記入寺尋訪彥迎曰許元度來也時岳陽王承誌公密記入寺尋訪彥迎曰許元

度來何暮昔日浮屠今如故王曰弟子姓蕭名譽何以許呼彥以三昧如彼悟前造塔之事由是修飭益增崇麗今龍德與龍興名實頗類是知前人所願力不可磨滅者皆一會再來人也豈偶然哉固不可以不記大德九年龍集乙巳春三月辛酉日記。明邑令須之彥重修龍德塔記邑東里許為龍峯山山肇脉仙華蜿蜒而南起伏蹲踞遞山而窮面襟大溪溪故受嚴陵諸山水越百里東注折而北入錢塘此山之概也舊故有龍德寺廢久寒烟哀草不可復識獨浮屠尚在考之遺帙創自天聖乙丑歷宣和寶祐至元葺凡三國朝正統開煨燼烈焰欄楯金碧丹堊胥屬烏有歲久弗葺風雨之剝落烏鼠之嚙噬樵牧之搏擊毀畫基日就圯觀察林公按部為之憮然捐十金為募義勸仍下其事於縣時令張公佐以贖鍰遴邑勤於事者六人董之會歲祲輸者恹財任者恹力所得若干緡半入奔命之腹踰數年葺僅二級餘圯如故夫力散則計緩任分則責輕時久則費滋歲歉則財嗇誠無怪其然辛丑余以上命改泄茲土人境不無黍離之感時田賦旁午未遑議期月事稍集呼前任者語曰役不卒業成之棄也委不卒命忠之薄也輸不見德議之叢也其何辭焉捐則帑縮而

浦江縣志

卷之五

古蹟

三

庚未必盈募則前負而後未必應急公高義終事美名其利圖之人各唯唯余遞為差等惟力是視羸者全授誦者半授其下一級視上稍宏做費亦倍之則余之俸錢也伐石於山掄材於市因力於傭隙者室之斷者續以闌層第以級鈴其角以驟風彩其障以蔽日試登其巔山川靈氣隱隱隆隆浮沉變現遙為接映俯瞰邑居不啻蟻垤數百家烟火出入浮屠影中鈞天奏又從空中下也亦邑之奇觀哉余聞之形家言都邑城市其陰陽向背山川所為吞吐氣載之游氣窮故聚溢故洩聚不表識不彰洩不鎖壓不留則標仙華已來之秀障嚴陵已洩之藏者胥塔是藉是邑固山川所吞吐而塔又是邑所吞吐也藉之弗修與無藉同數年來飢饉頻仍人民愁苦雖人事固然未必非風氣之故是役宜曰備登臨作無益哉工始於丁亥孟秋告成於壬寅仲冬所糜金錢以五百計先後與事者例得備書云林公諱一人材同安人辛未進士張公諱而綱晉江人鄉貢士時萬歷歲次癸卯孟秋之吉也

放生池

舊志

在縣東一里龍德寺東宋咸淳元年知縣

王霖龍置并建亭於池上後填塞爲田

宣詔亭

頌春亭

並在縣前

分秀亭

相宜亭

望仙閣

並在縣後

清心亭

清華堂

恕齋堂

思無邪堂

並在縣內

舊志

俱宋

高宗紹興十六年知縣蔣樞建今俱廢

翠微樓

在縣西二十里宋吳謙建

邑人鄭楷有記見吳溪文集

閩人謝翺

翠微樓九日落成詩岑樓九日落初成嵐氣烟光繞坐屏晉後白衣今代至吳中黃菊夜來醒月侵竹戶窺人語江過山城入水經涼夢不知巾幌動幽棲可要在巖垆。方鳳和謝臯羽詩樓成楚菊芳菲候客湊齊山醪酌期與俗相追何日了登高一嘯洗秋悲望窮碧落鴻飛外歸戀清樽月到時野服從茲近蘿薜西風塵土莫輕吹。又翠微樓對竹會飲詩縹渺飛樓修竹裏珠簾半捲清風起月明十二畫欄空美人遙隔湘江水夜深吹徹玉參差引到丹山綵鳳儀還倚仙翁九節杖翠雲深處望安期楚調歌殘仍擊節簷外紛紛落蒼雪樓頭

浦江縣志

卷之五

古蹟

四

醉臥笑元龍一片歲寒心似鐵今廢

存雅堂

在縣北十里仙華山麓後鄭村宋文學方鳳居

此鳳因宋亡隱居不仕自號巖南老人日與括蒼吳思

齊閩人謝翺賦詩贈答音調悲涼以寄黍離麥秀之慨

云

義烏黃潛寄詩云牢落江南賦知音寄渺茫鹿麋行處有芝草夢中香遙興滄溟濶悲歌白髮長平生古

今淚滴破綠蘿裳。柳貫詩并序序云昔仙華方先生晚最嗜吟吾鄉詩道嘗一昌矣自公下地寂寥無聞余每深慨於斯閑居多暇方哀公手澤爲卷得公山中竹醉日感舊寄贈之作輒追次其韻詩云猗嗟巖南叟久化冥漠君巫陽不下招宿草荒秋雲篇章一一在旖旎揚餘芬誰昔開雅頌世方疎典墳重此窺制作悵焉遠興羣道散五十載於今嘆彌文巨窮積石源但涉九河潰不知黍離降遂及東門枌公誠後死者幽明已中分絃歌三百首烈火豈易焚向余黍末至於茲愴前聞嘉穀雖屢歉旱苗猶足耘嗚呼召公臣閔下如蒼旻胡不

扶雅道廓然蕩埃氛公詩載揚熙與世析朝醺。吳萊
夢巖南老人詩云文章餘耿光耆舊日僵仆晝思見其
人夜夢如識路恍惚疑尚存蒼茫杳難據青山真隱淪
縞髮老韋素修名可千年俠世空且暮何哉白玉埋肯
有黃金鑄從知蕭散姿已是神仙具聞闔摩日月蓬萊
拂雲霧元鶴來頡頏赤虬下馳騫車輿清冷風糧食沆
漉露憐予此流落愛我終游豫云胡縈苦心曷不縱遐
步巖香返梅魂嶺物輪桂蠹鏗其弄琴書儼若陪杖屨
淒涼枳棘叢寂歷芭蕉樹
我淚無處傾荒江自東注

梅塢 在縣北仙華山麓宋進士趙崇袍於此植梅數里

故名明進士張應槐仍舊址結廬曰三陽小隱

今皆廢

譙樓漏刻 在縣治大門譙樓上元武宗至大二年達魯

花赤忽都魯沙敦武重造元邑人陳公凱漏刻銘并序

器敝知縣事何宗姚續置其法最詳人皆準而信之後為當路者取去莫知所留矣至大己酉達魯花赤忽都

浦江縣志

卷之五

古蹟

五

魯沙敦武慨思缺典遂依式重造且處其所以守之者
非勤政而知所先務歟前婺州路月泉書院山長陳公
凱為之銘曰撫字之官大要以剴繁治劇興滯補敝為
最厥有懈廢匪政之成其政維何必也寬猛克濟弗棘
勿遲然後愛民之仁推而為利物之智而咸服其精故
三尺之箭五斗之餅不贏不虧以正以平晝夜晷刻申
縮合度可以測陰陽寒暑四時之運行凡任於茲者盍
思古人挈壺氏之有職前賢蓮花漏之有銘後之視今
今之視昔亦庶幾
更點之分明矣 今廢

光風霽月樓 元翰林供奉文字陳公舉所居方鳳題光

風霽月樓詩序云光風霽月四字晦翁書刻石建州陳

正臣提舉浙江為翰林收書至建得此本歸遂以名其

樓 按正臣既顏其樓西秦張栻淮陰湯炳龍莆田劉

濩永嘉林景熙輩相率為詩歌以賦其事永康胡穆仲

爲之序宋邑人方鳳詩人閒底處無風月知用何時最
雅重無極翁灑落襟懷與此同去之百世猶彷彿宛見
道貌匡廬中誰題品語黃太史大書四字紫陽子今從
建水得此本如拾蟻珠捲文綺攜歸八詠雙溪州晏今
然直與造化游無邊妙處乃萃此躋矣君家百尺樓
廢

松林書院 在縣西十里松林山下元至正閒集賢學士

吳直方建久圯遺址尙在

松山小隱 在縣西五十里由裏溪入緣澗而升眾山環

之中開一境處士吳萊廬焉署曰松山小隱府志所云

歸松山中研窮諸經卽其處也國朝邑人朱興悌松

詩深裏留餘址行行上翠微一溪諸澗合三徑萬峯圍
石瘦松根老春深蕨菜肥著書人不見極目有斜暉

浦江縣志 卷之五 古蹟 六

聽雪齋 在縣北九十里元戴士垚讀書處柳待制貫書

聽雪二字以顏之會稽楊維禎爲之記記云金華戴仲

次舍明旦復持卷來曰垚所居齋室鄉先生柳道傳氏

嘗書聽雪以顏之未得記而先生卒且令垚有請於吾

子幸吾子賜之言余重違先生契濶喜而且嘉仲積之

切切於雪也爲之言曰雪一也聽有不一焉僵而聽卧

戶之士羈而聽被鐵之夫業而聽又甕牖之儒蓬廬之

漁耳仲積宅盛志廣而才甚長見時顯貴人咸喜而與

之遊出鄉遊通都且將北上京國有風雲之會而於雪

也奚能效前所陳者聽耶抑聽雪以聲固不若聽雪以
理者之聽爲深也今夫雪也者出元而生白似化藏於
密而散彌六合似道將集而霰先焉似幾陰涸而合現
而消似時匿瑕藏疾似量無論穹卑險夷一稱物以施
狀似平治若者雪之具德廣矣仲積反之在己不在
雪也則其取數於聽者不旣多矣乎不然吾懼仲積之
所以聽者卧戶之飢士被鐵之戍夫甕牖之窮儒蓬廬
之寒漁耳何取於柳先生之屬於雪者哉仲積起謝曰
垚固知聽雪以聲固不若聽雪以吾子之教也五洩之

麓敞廬在焉逝將歸矣請書為記。山陰張憲聽雪齋詩萬籟入沈冥坐深窗戶明微於疎竹上時作碎瓊聲撲紙春蠶亂爬沙夜蟹行袁安政無寐欹枕漏三更

迎華樓 元處士朱仙所居東陽陳樵賦序云浦陽朱仲

山名其樓曰迎華以思親也其先人好神仙云今未詳

其處 元陳樵賦昔在黃帝世有元德敷佑下民芳猷允

鸞儀方標鳳翥青靈既蒸甘泉罷御繼龍轡之遺髯振

清簫於雲路媿仙華之明秀兮夫亦靈修之所寓也伊

仙華之雄峙實作鎮於海隅蟠元氣之漓淋泛浩翠之

鬱紆候神之館既相望於東南兮又下通於鼎湖祠廟

千秋歲時奠瘞祥慶是徵民無札瘥嘉薦明粢芬芳式

備登茲樓以清眺兮抗仙掌之千尺烟分霧繞霞舒雲

積二華藏英莫之能敵九華歛秀攬之失色上有人兮

永懷慨先人之傲廬華梁婉其承粉兮重樂屹以綴櫺

朱華被井密藻垂疏巡瓊筵以躡步兮思帝子以愁予

想神君之游行建雲旄以前驅登寶衢與雲術命含雷

浦江縣志

卷之五

古蹟

七

使清塗霞為車兮虹紉從軒轅兮山之下靈奉轡兮驂
車朝吳雲兮暮為楚雨若方平兮曼倩挾麻姑與王母
靈風颯其揚塵兮獵元陰而靡丹黃碧鷄羣飛而晝驚
兮疑神君其並來俯回軒而四顧兮有平莽之萋萋曾
光塵之莫覿兮悵獨寢於空幃夢仙家之鉅萬兮瑤臺
轟其峻嶒赫祥雲之燭日披赤霧之冥冥覆明霞之游
館蔭光碧之殊庭翳紫桂之神宮列積金之層城翠水
曾波碧林被宇拂珠樹於犀階植文玉於蘭渚瓊柯鬱
以離立金棍儼其相拄神獸敷曜於陽林朱雀流光而
來下亦有五色游龍青霄玉女以守瑤林之桂實龍
葩或拾翠鸞之墮羽葺芙蓉以為冠攬霧綃以綴衣望
九靈其如雲聯霜袍以成帷挾龍符之靡曼蔚鳳綬之
葳蕤勒黃金之條脫兮緹以水碧之藍絲曳赤玉之飛
鳥兮藉金液之龍芝揮晶精之寶劍兮映碧奈之華滋
忽若靈之在旁兮雖信似而懷疑起撫懷而興慨兮知
夢幻之不可期敢交疏以周覽兮瞻瓊岫之滢滢愁翔
陽之短景兮忽委照於西壤屹元冥之雲譎兮繡闥儼
以雙敞源砥有竦柏木於元林藉芳葯於叢莽彼草
木之無知兮有喬梓之俯仰紅翠嚶其載鳴兮聽璇房

之遺音游鶴兮杉鷄曜斐尾兮紛文襟豐狐晝啤於林
薄兮騰猿援木以清吟羨楚烏之返哺兮感鳴鶴於江
陰攬萬物以自悲兮苦愁思之不可任臨長風以孤嘯
兮明月出於東方繁星粲其麗天兮若蘭甸之流霜情
於邑而不寐兮恨神爽之不可望慕帝子之承顏兮從
君王以翱翔會來歸之未期兮淚沾襟以浪浪陳悲歌
以下招兮夜漫漫兮使予心傷歌曰燭銀玉菓璧環光
些雲烟霓禱不死床些瑤壇金闕光碧堂些居室之麗
無以方些碧芝琅菜扶桑實些玉酒醴漿五英液些風
林鳴醋中華蜜些綺饌之腴莫之能及些雲裝烟駕龍
迴車些飛輿八景麟胥胥些上下風雨翔紫虛些車服
之盛不知其餘些綠雲飛觀中天樹些四榮翼張若騫
翥些清防暗列浮思布些雕機朱絲有竹素
些雖信美兮非其故些魂兮歸來返吾居些

九靈山房 在縣北九十里九靈山下元季戴良居此自

號九靈山人嘗賦詩以見志 山中度歲詩云去年當歲暮我方家市邑時復掃新

居親朋爲之集天運不可常周辰今已及投跡此山中
酒杯與誰執故歡隨歲去新愁帶春入惟獨聞爆聲依

浦江縣志 卷之五 古蹟 八

然如舊習。又還舊居詩自我遠行遊故廬今始歸如
何廿載閒舊事都已非曳杖過比鄰相呼尋故知不見
垂白翁但見初長兒我園旣稍葺我田亦就治種秫釀
美酒拾薪煮豆糜一笑集親朋相從說睽離以之感疇
昔俛仰多所悲人生一世中所憂渴與飢力耕得其用
此外更何思便當息吾駕皓首以爲期。又居田詩我
生非匏瓜於世可無食躬耕實所慕戮力歸稼穡當春
土脉動農事滿阡陌晨興負耒去日入弗遑息我苗今
已長我耕有餘隙斗酒勞近鄰隻雞禮過客人生復繪
但如是亦足慰平昔此意誰復知千載惟沮溺

九靈山房圖頻年宦游輒以自隨居鄞時揭泫烏斯道

胡惟仁輩皆爲作記 見先生年譜 會稽唐之涓賦 云夫何浦陽之涯九

靈之下有幽人兮抱道乃斯焉而托處於是憑林考宅
緣崖葺宇門絕塵軒途迴俗軌求至理之元微陋時俗
之紛沮顧情累其旣泯豈世網之可迂爾乃懷荃握蘭
雲飲露餐稽經詠史玩蹟探元念往昔其曷今視後至
其無前爾其嘉會之仇肥遜之侶則木客芝童鴻生雅
士或倚桂而言嘯或誅茅而廬旅詠招隱之古辭將終

焉而弗侮胡干旄之在浚又良馬之云五緇衣傲兮改
 為白駒繫兮場圃豈蕙帳之虛空信蓬累其時舉值陽
 九之頹運嗟風波之流阻既南翔乎荆吳復東邁乎齊
 魯慨節運之代序竟荏苒而歷茲越河山以托景每愴
 况而念之倘彼途其未遠庶此日之可追亮東臬之有
 事迨北山其未移惟余生之尚賢慨既出而終隱方混
 迹於塵囂冀遙舉而遐引矧高山之仰止揆十舍其猶
 近已焉哉顯固有機兮晦亦有時惟道之修兮毋世之
 譏彼珠玉之韞兮猶川媚而山輝采芝兮采薇自古兮
 有之○中山劉履九靈山房詩峩峩九靈山上仙靈
 居雲霞互興沒巖林鬱盤紆皎皎棲遯士飄飄列仙儒
 結屋依蘿薜櫺牖紛交疏嵐靄延几席崖溜隨階渠鶴
 鶴宿簷端麋鹿游我除石室探神秘充架多異書同懷
 日相集微言皆道腴揮毫發蘭藻振珮鳴璜琚就云形
 迹滯心與天壤俱夙昔聘奇懷整駕勞馳驅悠悠望九
 道改轍將何如黃綺憂駟馬展禽知鷄鵝聊申獨往願
 庶用旋吾廬○慈溪張庸詩九靈山枕東海涯中有方
 壺子之家三華婀娜映樓閣六窗瀟灑通烟霞麻姑顏
 童飢玉雪相看互授人長生訣時時石上搏元霜夜夜山
 中弄明月年來忽作人閒夢欲起沉疴濟時用蒼生多

一丹蛻凡骨山中
 國朝嘉慶年間先生後裔戴司訓殿

海補繪是圖徧徵題詠

錢塘梁同書詩云九靈先生居
 九靈山居滿眼山光青當時作

圖隨行笈到處髣髴依巖肩先生生理學繼濂洛先生著
 作光典型同時輩流盡人傑熟聞姓氏如驚霆巋然大
 元一遺老浩歌薇蕨羞周廷義不二事死不惜力挽天
 地昭常經清風凜凜四百載下與來禳傳芳馨十四世
 裔作司訓鳳毛故有摩雲翮追為此圖述祖德恰遇好
 手摹林垞前村稍見出樵牧漢西隱約窺畦町若有嵐
 氣侵戶牖雲中突兀開軒櫺支頤獨坐意自得耳邊已
 似聞風鈴江天在眼極寥廓長吟悵望青冥冥○袁枚
 詩云九靈山高與天接中有先賢戴逵宅著述能將濂
 洛追門庭只許烟霞入奈值元明鼎革秋飄蓬未克老
 菟裘故山且自描行障宗炳何妨作卧游名流幾輩欣
 相遇卷上都留珠玉去此後滄桑歎屢更不知神畫飛

何處賴有雲仍後起賢重煩名手寫層巒迢迢風景從
 頭記歷歷田廬到眼看雙扉不掩山嵐合髣髴先生還
 下榻夕照溪邊釣艇歸高吟雲外樵歌答屈指年過四
 百餘披圖往迹費追摹想當日幽居所笑問蒼松記
 得無○吳錫麒詩云我懷九靈客忽見九靈山廬井依
 稀處松杉遠近閒高風樵子說明月鶴聲還滿眼紛蘿
 薜相從畫裏攀○戴殿江九靈山房藏書記科舉興而
 經籍廢士之懷鉛握槧者但抱兔園十餘册剿襲成篇
 卽可以致通顯若是則奚事於書有解事者以百什金
 相載坊書歸而牙籤錦帙輝煌乎奇器名畫之閒若是
 亦何從言讀有書矣又能讀矣而苟非立有章程以守
 之則其散也不必兵火也雖聚猶勿聚矣大江之南稱
 藏書者祁氏之曠園毛氏之汲古閣黃氏之千頃堂其
 著也而徐氏傳是樓則尤著若兩浙藏書家有歷三百
 餘年而整比如初者則唯天乙閣范氏自司馬公沒後
 後人藏守極嚴范仲友破戒引黃梨洲一登樓爲輯其
 書日以傳而其書之有入無出者如故也蓋非孫月峯
 胡孝轅紐石溪諸家所得而比倫者矣至吾家九靈山
 房之藏書則有不宜沒其緣起者乾隆甲申歲仲季瀛
 三東瞻游學吳山購求九靈山房遺集備列吾婺先哲
 遺書囑慶雲齋書賈購之書賈質諸知不足齋鮑君以
 文鮑君一見書單曰此金華友也問何姓曰戴氏則又
 曰戴氏有九靈集板毀矣而予所畜抄本則佳然不輕
 授也書賈以告仲季聞先人遺集在驚喜卽價以往謁
 各恨相見之晚立出抄本付梓鮑君曰予性喜茗飲君
 家九靈山春茗色香味並佳幸爲予致之君家寡有之
 書予亦可漸致也則應之曰諾於是武林之書肆茗雪
 之書船姑蘇之估客有好本無不致積數年書稍稍集
 而鮑君曰未也聞嘉禾一大姓積書數萬卷近以遠官
 欲售盍訪諸則買棹急往發其所藏凡吾欲得之書與
 未見之本多在焉乃以千金致其書山中而九靈山房
 之藏書乃甲于浙東六郡矣是役也浙人多稱道之時
 韓城王相國視學兩浙謂鮑君曰禾郡精華其集於九
 靈山下乎予當爲記之其後瀛三歷署教職所至必以
 書隨未能閉關卒業東瞻旋亦北上繼入詞垣讀中祕
 書且與藏書樓久闊也然而藏書之章程則已具立矣
 凡曝書有期修書有費書目既定永矢弗出良友嗜學
 者聽就抄不聽攜去庶可免於借書之癡鬻書之不肖
 乎抑予聞黃梨洲之言曰藏書者如護目睛而元儒程
 畏齋讀書分年日程則謂經史百家皆當循序以進吾

戴氏之書僅藏之而已乎抑不僅藏之而已乎乃集子
姓而告之曰分年讀書之法凡屬中資皆可勉也如護
目睛之喻乃藏書家四字訣也傳是樓之所以甲于大
江以南者以能讀也天乙閣之所以甲於浙水東西者
以能守也汝曹其
謹識之是為記

天機流動軒 在縣城南隅亦戴良所居金華胡翰仲申

記畧云余公闕至浦江問士於趙侯謙齋侯以叔能進

公深獎許之為榜其所居之軒曰天機流動叔能命子

記之戴良書天機流動軒卷後良盛年時識齋國余忠

宣公於浦江官舍公方持使者節行縣欲執弟子

禮莫可也後遊郡城遂因論詩獲質所疑於公公為書

此四篆以遺蓋良所居軒區也攜歸山中鄉友宋君景

濂首為贊一通且貽書東陽陳君君采記之而金華胡

君仲申烏傷王君子充麟溪鄭君仲舒皆先後為文以

寄即嘗命工刻置軒壁矣亡何天下大亂在在兵起乃

一切委棄避地海隅及以垂暮之年歸視故居軒雖苟

浦江縣志 卷之五 古蹟 十一

免而壁閒舊刻無復存者急探行囊僅得公所書親蹟
及四君記文揚本而已景濂之贊亦竟不可追蹤卷中
跋語則後所追為者也於是公以淮南行省右丞相死
節安慶君采以處士死於鄉入國朝景濂以翰林學士
責死西土子充以翰林待制斥死北地仲申亦以儒學
教授寄死野人家同時流輩凋落殆盡獨仲舒以前朝
故官家食無恙然亦頽然老矣由前至今俯仰未三十
載而變幻不常如此所恃以持久者惟字畫與文章又
未知去此三十載其字與文與所蓄之人還能相守如
今日否學佛之人指幻境為空華豈不信然歟良既以
四篆四記聯之為卷而復詳著其始末於後暇日一取
閱之安得不為之三歎乎邑人陳毓秀詩投身吳越
羅昭諫卜卦橋亭謝疊山誰識今廢
余公門下士黃冠原不望生還

石广 在縣南三十里烏蜀山元待制柳貫讀書處

怡顏樓 在縣北九十里金沙元末邑人倪彥良彥寵兄

弟隱居不仕築此為息游之所其地又有延壽菴為倪

天寶天寶兄弟別業今樓廢而菴尚存邑人戴聰過山頭坪延壽菴詩
并序前明洪武永樂間金沙倪貞為陝西按察使簽事
倪孟初為敘州府知府倪天與為大名府知府倪子恬
為羅田縣知縣多以人才薦擢見邑志倪相則明初省
元邑志失載又有倪彥良彥寵兄弟元末隱居不仕築
怡顏樓為息游之所先祖九靈山人為作記并詩同時
文士題詠甚多宋文憲亦以詩寄池菴則倪天賓天寶
兄弟別業也一時文物之都地館之盛山川為之生色
乃一畫像猶存里老尚能言之不能舉其姓氏惟此菴壁
間畫像猶存里老尚能言之不能舉其姓氏惟此菴壁
憐松篁開覺路冠蓋憶當年樓惜怡顏圯菴惟延壽傳
同龕好兄弟
像貌尚依然

青蘿山房 在縣東三十里青蘿山下元至正六年宋太

史濂自金華徙居於此太史有蘿山遷居志云余世居

里之潛谿其地在縣東七十里禪定院側溪之東即入
義烏境元重紀至元元年乙亥正月十五日授經浦江

浦江縣志 卷之五 古蹟 三

義門鄭氏久之以其家九葉同居乃願卜鄰焉相地於
仁義里孝門橋之上其地直縣東三十里有山曰青蘿
至正六年丙戌十月二十七日於山趾建寢室三楹閒
繚以周垣前做小門十年庚寅二月十五日攜家自金
華來遷揭其匾曰潛谿示不忘本也十四年甲午十二
月八日再構前軒如寢室之數東西榮之屬以次告完
匾軒曰青蘿山房因舊山而志新築也十八年戊戌六
月十八日國兵取浦江遂避入諸暨兵雖定浦江當戎
馬之衝不可居十九年己亥三月十五日還潛溪故廬
越九載始重葺治於是復來遷時國朝吳元年丁未
四月一載始重葺治於是復來遷時國朝吳元年丁未
敢輕於棄去或去之必出於勢之不得已今予豈有他
哉特欲薰漸孝義之風以勸我後人爾然蘿山之望潛
溪朝發而夕至非若別郡千百里之遠宗屬之胥會先
瑩之展省固未嘗廢其與弗遷者初何異哉余既來遷
偶閱宋嘉定未官給地券所居左右曰宋公園圍與子
姓同亦似不偶然者豈其數或前定歟予子孫居於此
者毋析爨毋為不義毋侵蝕比鄰日衣被乎詩書耕則
為良農學則為良儒庶幾不負予之志也○明青田劉
基青蘿山房歌若有人兮乃在大江之南浙河之東連

浦江縣志

卷之五

古蹟

三

山特拔瀛海上上與河鼓天津通憶昔四女下天來遺
 鬢墮髮根龐鴻仙華傑出最怪異望之如雲浮太空嶽
 峯崿崦鬱齧不可上蒼蔚雜樹昏瞳隴虎龍咆號猿鶴
 叫山鬼呵歙生悲風嗟哉若人兮胡為乎其中梁檀栢
 兮柱桂楓結青蘿兮以併幪不剪不伐兮不鹽以攻晨
 嵐莫靄滴晴雨烟條霧葉相蒙龍縵縵兮纒纒萃萃兮
 蓬蓬繚糾要紹兮若蒼龍垂胡降元穹穹麗披離兮若
 翠鸞振迅飛氈氈鸞黃和鳴桑扈應髣髴牙曠之絲桐
 幽泉發寶鏘玲瓏六月赤日收蘊隆陽凌陰蓄春融融
 巖花澗草紛白紅有時皇初平清夜騎羊朝帝宮瓊糝
 羽蓋冰玉珮華月閃爍光成虹松吹笙兮竹舞翻影旆
 旆兮聲淪淪娛耳悅目兮樂不可言世閒塵土何夢夢
 山有芝石有豐石鑿鑿兮水滌滌猗若人兮美且充飢
 食倦息兮可以保我躬逍遙兮棲遲又何訪廣成於崆
 峒○明崇德貝瓊青蘿山房歌并引青蘿山在仙華之
 東蓋仙華為黃帝少女升天處其山峭立千仞而支別
 為青蘿山房絕嶺之雲烟長溪之魚鳥皆接於耳目之閒
 矣公雖去此而猶眷眷不忘閒屬予賦予聞適意山林
 者恆抗公侯之富而爭名市朝者恆譏處士之介是皆

得之此而失之彼惟公則不然昔之藏也非必於山林
 安其時也今之仕也非必於市朝行其道也故在青蘿
 不為損至於視草北門亦不為加隱顯一機喧寂同趣
 孰得而窺其際耶公擅一代之文章所著多行於世而
 貯於山房者必有光氣燭天與山之寶玉同不泯矣遂
 為之歌曰仙華之山何嶄絕兮插天之萬仞青相磨山
 東來忽平地蜿蜒不斷為青蘿青蘿隱隱如崩石夸娥
 負山忽平地欲叫軒轅向何處千古萬古空遺蹟玉女
 得道登雲車凌空直上太清家雲車不復返落盡金莖
 花風淒淒兮又下雨行人慘兮子規語山回路盡或逢
 花知是青蘿山下人結茅宇山人紫府神仙客身今六
 頭尚黑胸蟠五色天女絲手煉五色神媧石絲可為君
 成天章石可為君補天隙一朝寘之白玉堂青蘿寂寂
 寒無光何年借我白石床卧看明月來東方與君酌酒
 歌我曲君歸早訪初平羊○國朝邑人王宇清游青蘿
 山房詩層巒欲北郭疑向畫中看雨過疎林瘦雲歸晚
 洞寒青蘿餘夕照白石咽飛今廢
 湍遺址今猶昔風流嗣更難今廢

小龍門

宋太史濂著書處按宋答郡守聘五經師書有

云所居之北有一峯峻甚俗以其如馮翊夏陽之山因號小龍門

登高里 在縣東二十里王梅嶺北明宋太史時於此登

高故名

國朝金華曹開泰登高里懷古詩十里蚪松鐵甲蟠未霜楓柏半流丹厓雲削翠當頭落村

樹圍青潑面寒覽勝但尋名蹟易高風欲繼古人難涓

涓一掬靈泉水幾度先生拄杖看。羊公峴首謝公墩

無限名山屬一人堪笑羣峯都秀拔不逢佳士也沈淪

爪痕并乏穹碑記屐齒疑沾學士塵翹首青蘿通指顧

秋聲瑟瑟滿衣巾

建文井 在縣東二十五里白麟溪之西明建文帝出亡

謀所止咸謂浦陽鄭洽家

時官翰林院待詔

忠孝可恃遂匿焉

俄有構蜚語者文皇遣捕其家帝匿井中得脫故名見

浦江縣志

卷之五

古蹟

古

史仲彬致身錄

白石山房 在縣南十里平安張氏祖遺讀書之所明初

有字拱辰者受業於副憲張孟兼先生見白石聳峻以

寓比德於玉之意因自嘲曰石瑩無瑕韞玉山輝士貞

淑德有光庭闈遂匾其居為白石山房

明李默記白石山房浦陽平安

張氏任福建布政使祖遺讀書之所也厥氏出自姬姓傳至五季時懷仁公卜居浦陽至高祖學正公十一世

矣公之尊府君隱德弗耀從兄孟兼仕至山東按察使副使從叔子玉任湖廣左參政公未仕時養高泉石栖

跡烟霞貞節雅度偉才碩德為鄉里所推譽嘗指白石以自詡曰石瑩無瑕韞玉山輝士貞淑德有光庭闈居

無何徵書倏至太祖高皇帝擢授廣西布政使歷官積勞簡在帝心令掌閩閩布宣德化紀綱丕振治政興舉

仁恩洽於萬姓威望肅乎百僚信乎地靈人傑光耀闕閱而無忝前修也公暇每馳慕故居清致有不能一日

忘者命畫師繪圖裝潢成帙名士咸歌詠以資觀玩異
 日公歸休故園優游眉壽樂山水之趣賞風月之景孫
 曾滿前流觴舞彩則白石山人稱爲神仙之窟宅矣
 默拜手序其梗概而贊以繼之其辭曰有堅白石其璞
 璀璨雲根凝雪瑩色交輝匪琢匪磨滑底瑰奇礫确塔
 砌磊砢堂基層簷宿雲高倚翠微有喬其木棟梁是資
 樂只君子貞德非虧握瑜待聘出佐明時翱翔雲路聲
 譽蜚馳顯榮有年組紱簪主豐功茂烈百辟是師爲屏
 爲翰天子是毗光前耀後福履是綏鸞鵠載頌歸老庭
 闡官業謨猷永播聲詩。明婺源詹同白石山房歌浦
 陽有名山白石如積雪玉氣亘中天龍湫無六月於茲
 隱君子結茅依巖穴簷榭披翠微優游讀書日看泉風
 滿衣庭草苔痕碧誰謂野鶴姿從心自飲啄日落樊籠
 閒清夢繞巖壑豈不念白石好煉五色紋獻之補天手
 歸作山中勲。明釋來復詩雙溪水際草堂深卜住青
 山十畝陰但自清心忘嗜欲誰言鐘鼎契山林山人別
 業當江口白石巉巖對戶牖上通百尺蒼龍湫綠水翻
 空作雷吼山人結屋知幾年山瓢還飲龍湫泉一洗心
 胸炯冰雪珠璣吐出雲烟青山閒可竝白石飢可煮
 碧山無路著高車幽深只許野樵語八窗夜涼愛虛碧
 古蹟

更倚梅花讀周易山光照室氣如虹雲母屏開山月白
 山人此時毛骨清坦腹晏坐忘形神眼觀八柱洞眉接
 浮生何事紛營營叱羊不羨初平坡爛石不學甯戚歌
 却餐千年石中髓絕粒更欲接雲蘿更須石剖攻奇璞
 莫混珉岡屬邱壑斲爲圭璧獻吾君願奉廟堂崇禮樂
 樂成禮備歌雍熙拂衣更向山中歸掃花釣月坐白石
 無勞太史占少微。盧鎬題白石山房歌汲黯甚矣巖
 次公醒亦狂鷹隼乘秋有本性雍容安得如鸞鳳哀哉
 先生嫉惡懷剛勝一擊異端反中傷韋弦雖遠良友箴
 弧矢早耀鶉火光我讀先生傳幸登先生堂稜稜石骨
 秀出南斗傍屹如底柱獨立河中央纖草不敢活妖狐
 無處藏慟哭記冬青行想當泚筆慨且慷紛紛山花不
 掛眼相對惟有百尺孤峭凌風霜作爲文章亦秀削森
 森矛戟生寒芒青田與潛溪同朝相頡頏惜哉不得死
 餘論徒商量人生生死要各命所當溫和不勝剛強
 君不見遭毒手投要荒開國元勳尙如此劫火那得逃
 崑岡士生不幸後三季直道久矣難激揚所以古之人
 南山之石縱可爛釣竿不肯辭滄浪。明高起題白石
 山房圖詩石氣春生化白雲滿林瓊草卧羊羣太常他
 日歸來日身老應同萬石君。釋宗泐題白石山房圖

詩浦陽先生張太常白石山下開山房讀書養親不下
堂青山愈高溪愈長一從攀龍上金闕山中十年青草
歇夜飛清夢到山房堂上雙親已白髮孫卿頗擅丹青
妙為寫新圖慰懷抱秋雲半掩草齋寒白鶴不來松樹
老我見新圖憶舊山石梁懸瀑蘿陰間金華赤松咫尺
閒何日拂衣從此還。國朝乾隆二十九年知縣何子
祥命張氏後裔
增葺擴為書院

迎薰樓 在縣東二十里長塘之左黃氏因洪武八年已

未蠲租而建庚申秋黃逢源與戴九靈蘇眉山諸賢會

飲賦詩於此九靈山人為作序 序云庚申之秋予訪蘇

自是入越黃氏之老資深公堅留不聽去既而劉君養
浩趙生彥方亦相繼至而吳侯子宇則固客授其家資
深悉宴之宅左之南薰樓歡洽殊甚養浩以此會雖出
邂逅然蘇先生來自府城彥方至自邑已與子宇館寓
雖近而亦一居嚴陵一家烏傷萬山中不鄙謂予又方
回自千里一旦畢集於此豈偶也哉睹江山之如昨念

浦江縣志 卷之五 古蹟 十六

人事之難常誠不宜以無紀資深之子仲昭英俊弟子
也聞之喜躍即請以今夕復何夕共此燈燭光分韻而
予得此字先生且命書歲月遂序之云而系之以詩曰
昔出念途遙今歸嘆年駛泰階謂久平吾道有如此主
人識予意開筵集文史庶令歡宴餘悶懷為之洗談諧
皆素心唱和盡知己此會諒難數不樂將何俟。蘇伯
衡得共字詩悠悠阻良覲栩栩勞清夢冉冉芳歲徂養
養憂心動誰知握手歡天方今夕共愁消若冰釋喜劇
如射中念彼合併難感此情意重盡醉安敢辭聊樂為
未縱。吳棟得今字詩天高玉宇淨浮雲弄晴陰南山
狀自古秋色淡於今登樓瞰霏碧良朋成盍簪嶽談霽
氛鬱默契三生心珍重主人意持酒許頻斟飲樂真
率交誼期斷金。劉剛得燭字詩商飈下喬林度我朱
絃曲知音適已遇三歎為停轂謝庭芝蘭森雅奏塤篪
續高閣開素秋初筵秉華燭河清願濯新月出起遙矚
嘉會良亦難且進杯中醪。趙友直得夕字詩灑氣凌
秋清晚山映天碧佳賓歛來泣若聚金與璧主謂會合
難登樓款今夕涼颼度綺疏夜光動瑤席燈燭共輝煌
杯盤肯狼藉瑚方前陳只慚混燕石。黃逢源得光
字詩有客過我門癯然鬚眉蒼村居倚山塢何由得瓊

漿殺採北山蕨酒借東鄰觴涼颺遞幽響明月揚清光
客情何真率為我樂徜徉謔浪恣歡謔形骸兩相忘
樓久圯後即其地建八角亭

益齋 在興賢鄉明戴原直所居天台方孝孺為之記記云

余始至浦陽與邑士戴君原直遇原直長身昂然顧盼
峭聳酒酣談論雜以嘲笑辭累千百無滯滯窘迫態鋒
穎橫出氣蓋一座余驚駭意其為奇士而惜余拙訥不
能與之往復詰難也二年又見原直其所為者余又驚之
而為禮恭遜歛戢顧意若自少昔之所為者余又驚之
疑其有所得而然未暇問也又一年重見原直於錢塘
諸公名士皆在席各吐所長為樂原直攝衣坐其下俯
首歛膝不發一談日暮賓退恂恂揖謝侃然趨去儼然
愿慤君子及與之言皆中道理去前時甚遠而諸公亦
稱其美不置余大驚而問焉原直曰吾少時嘗以醫出
遊涉吳楚沂淮泗至齊魯往來公卿間虛左以俟東帛
而迎者不可勝數吾時志高氣盛謂口舌閒足以成事
方以此自可嘗聞於季父能軒先生以為易之遷善改
過莫善於益乃以益名吾齋吾將歸而求於聖賢之學

浦江縣志 卷之五 古蹟 七

瑞蓮亭 在學宮外大方池內明邑令須之彥記天地蒼

不能受者融結為山水山水各據以勝而不能相有遠
近離合之閒人默揣其情之所會境之所遇構一奇以
收之令不自有其勝而為我有若浮圖殿宇臺榭之屬
皆收之之具也浦故據山以邑山半為闔闔隱盼不及
遠溪流盈縮視雨究盈不勝縮以故山水之勝人不得
而有云邑東南隅為學宮首枕一池畝可得五嘉靖辛
丑歲縣令龍公所鑿至萬歷乙酉歲庠生張元效募鄉
先生造石基巖然中峙蓋取堪輿家所稱印淨水面煥
乎其有文章也今辛丑歲九日余偕學博徐君躡清遠
樓笑指此基謂曰彼巖然者亦何文章之有山可餐水

可濯是不可亭乎亭之文更甚也徐君以為然余少佐
贖餒諸士競分膏餘徐君又時出其修脯以助不瞻未
幾而亭成為級者二為楹者四為角者八圍繞以欄層
席以板面皆向戶盡牖丹艸之華圖繪之巧爛焉奪目
規制修短廣狹悉如其基上級稍敞可布四席乞有餘
於天也基外復翼以板板外復夾以欄廣不足於地也
大溪前繞龍峯左峙仙華寶掌諸峯若起若立參差環
向則遠輔是亭之勝者睥睨若俯祠宇若拱騰蛟清遠
左右翼與亭角而為三則近輔是亭之勝者余扁其上
曰集翠志山也扁其下曰文漪志水也亭曰瑞蓮以亭
成適與並蒂蓮會故名也山不得水不勝水不得山不
勝山水不得亭不勝風和景明素紫接映游絲飛蕩野
馬細縵亭之日較暄也芬芳襲人紅白相閒微雨初過
水殿生涼亭之風較清也玉宇無塵澄然一碧垂楊掩
映疎影離離亭之月較妍也彤雲密布水天一碧垂楊掩
潛蹤寒江釣艇亭之雪較瑩也以至物態之變幻氣候
之陰晴轉眼即非凝眸即是有無隱見之景又是亭所
為無時無處而不成佳境者余與徐君暨諸士閒一登
臨遠者若近離者若合覺情景之會山水之合也憶昔
所謂巖然者僅一部婁今故與山水爭勝合而貯之一

浦江縣志

卷之五

古蹟

六

亭所謂文者顧不大耶諸士行將習習霞舉矣瑞蓮固
為之兆哉余竊念人事變遷蹤跡靡定登臨揮灑昔人
以為美談又若為絕勝難繼之事則俯仰今昔不無蘭
亭之感也徐君其有慨於中耶是役也經理規畫徐君
任之拮据奔走諸士任之工始於辛丑季冬落成於壬
寅仲春所糜金錢若干前後與事者例得備書萬曆癸
卯仲冬記今廢

候星堂

在縣東

陽春亭

縣東一里

舊志

明神宗萬曆六年知縣文

元發建懷宗崇禎八年知縣吳應台重修今廢

惠雲題壁

明萬曆天啟間通化倪尙忠與文學陳九經

僧真滿交最密嘗往來惠雲寺中多所題詠惜皆散佚

今大殿西壁猶存墨蹟數行雖已殘缺錄其可識者於

後云

不識惠雲寺松風吹梵音到來口隱趣瞻罷失塵襟淨理隨口口口自古今夜深三籟寂明月照

禪心口初地何年關佳城此日開亦知□□定應□□
非猜謔母祠前石瓊姬月下臺無生端可學且覆掌中
杯○天啟乙丑因奉送□尊□□茶人
厝此詩以紀之□□□士倪尙忠題

高遠亭 在縣北二里月泉側興廢無考

尙友臺 見康熙郡志圖 在縣東一里龍峯山北明慈溪人楊守勤

與邑人張應沛友善館寓此臺日與泛觴吟詠諸山川

閒凡數歲所至幽谷古刹品題殆徧今廢

瑞雨亭 明懷宗崇禎九年知縣吳應台卽高遠亭舊址

建明邑令吳應台記今上御極之九年歲在丙子夏五月不雨至於六月先是樹藝甫畢田父決其餘水糞而糞之南方之人所謂火耨者也旬日一雨則苗怒而加長否則膚裂而土堅本室而不能發故匝月之閒遂以旱聞農家率婦子編柳爲笠竿布爲幡徧詣諸龍湫巖穴閒捕魚蝦鱗蟹之屬貯瓶水方几輿之執械導從

浦江縣志 卷之五 古蹟 九

號曰迎龍金鼓之聲不絕蓋涓滴旣盡力無所用舉桔槔輓轆之工而畢萃之於此如狂如鬪見者不能不爲之寒心也子懼甚斷酒屏肉朝夕步禱越數日不得雨復踰旬迫甚迎龍者五步一拜號呼叫跳彌月復不雨六月十一日甲申子躡躑晨出隸人前報口張色動云南溪水一夕暴漲予驚且喜急遣覘之良然南溪者城南大溪所謂浦陽江也自西徂東垂百里與浦邑之境相終始沿溪則壤賦居邑額十之七八故邑以是名此外則崇山峻嶺可耕者無幾矣自是截溪以灌遞轉而上迎龍者稍息而桔槔之聲出矣浦舊雩地在南郊初循例往禱不得雨予謂南郊爲祝融司方盛夏陽壯而陰伏當移禱北郊月泉之旁有小阜北望仙華雲露之氣呼吸相接禱之必得雨邑士大夫倪常博心開張孝廉汝金張巖副尙聘樓孝廉邦魯皆然予言遂步履爲余先踰數日聞西際殷雷聲極目望之片雲黑如笠三日皆然不謂卽是雨也是歲稻穫十之六近溪者全獲而粟蕎之收更倍他歲浦之飢視他邑爲不害浦人志之歌詠鼓舞咸歸功是雨日見獨不見古之志瑞者乎五穗之麥不供一粥史官書之朝野頌之茲雨於西山之

顛而稔乎東原之陽且西而蘭東而暨或以源隔或以
流止皆不得分其餘潤以爲沾溉一似造物之獨私吾
浦者然視彼數莖之偶然者大逕庭也烏可以無志今
予曰若然誠瑞矣因捐糈爲亭伐仙華之石以志之
廢

攬轡亭 在縣南一百五十步今廢

荷塘書院 在縣東二十里後葉村爲明孝廉葉化醅葉
有聲兄弟讀書處東陽許宏綱從學於此今廢

